

Kangaanga n te Bwaaki

E ikerake Hunter. "I aki taetaekin taeka akanne."

Iroun Diana Evelyn Nielson
(E boboto i aon te karaki ae koaua)

E riki te karaki aei i Amerika.

E biri Hunter n rinuukan te bwaaki ma raoraona. E moangare ngke e namakina te ang irarikina. E namakinna bwa e baiti ao ni bebete!

Kyle e moan taua te oo. "I moanna!" e takarua.

E roko n te oo Hunter teutana te tai imwiina. "E aki riai! Ko moan nako."

"Eng," e taku Miguel. "Ti a kaboo birimwaaka nakon te aroka!"

E manga moana birina riki Hunter. N te tai aio, e moan taua te aroka. Ma Miguel e mena raoi i akuuna.

"I moanna!" E taku Miguel.

"Ko aki, e moanna Hunter," e taku Piper.

"Eng," e taku Kyle.

E boti baina Miguel. Imwiina e a taetae buaka naba.



KAMATAATA TE TAMINE IROUN SHAWNA J. C. TENNEY

A ngare ataei ake tabeman. E a manga moan atonga naba te taeka arei Miguel, ao a manga ngare riki.

E nanokawaki Hunter. E ataiia bwa te taeka arei tiaki te taeka ae raoiroi atongana. Ma e aki tangiria bwa e na ngareakinaki. E aki atonga te bwai teuana.

Piper e manga atonga te taeka ae buakaka teuana. Ngkanne Kyle e a manga atonga teuana riki.

"Ngkai atonga teuana, Hunter," e taku Kyle.

"Eng, e nako," e taku Miguel. "Atonga te taetae buaka."

E ikerake Hunter. "I aki taetaekin taeka akanne."

"E na bon aki kaikoakiko atongan teuana te taeka," e taku Kyle.

"I rawa," e taku Hunter.

"Ko maaku?" E ngare Miguel.

E namakinna bwa e moanna n bue ubun Hunter. "N nang nako n takakaro n te tabo riki teuana."

Nikiraiia ataei a tabe ni ngarengare ao n taetae buaka. E tangiria ni kararoua Hunter. E aaki kakukurei n te tabo n takakaro ngkai. "Ti a manga kaitibo imwiina," e taetae n karaurau.

E karinii baina Hunter inanon buuana ao e karaurau n nakonako rirarikiia ataei ake tabeman. E aki namakinna bwa e baiti ke n bebetei ngkai. E namakinna bwa e tineaki.

E nooria tamana ma tinana n tekateka iaon te kaintekateka. E katuka ana boki tamana. "Ko raoiroi?"

E kakui angana Hunter. "A moanna n taetae buaka. Ao ngai I aki kan karaoia, ngaia I a nako naba."

E wiingare tinana. "E ninikoria anne."

"Ti rangi ni kakatonga iroum," e taku tamana.

"E kangaanga karaoan rinerine aika a eti ngkana aomata ake irarikira aaki."



E kanakoa angina Hunter. E kukurei ngkai e karaoa te rinerine ae eti, ma e aki raoiroi ana namakin.

"Ko tangiria n okira te auti?" E titiraki Tinana.

E tabe n iangoia Hunter. "Tuai moa," e taku. E taraia ataei tabeman ake a bobotaki n takakaro n te zip rain. "N na nako n takakaro ikekei."

Ngke e nakonako Hunter, temanna mai irouia mwaane e katea baina nakoina. "Mauri, arau David."

"Ngai Hunter. "I kona n kibakiba ma ngkoe?" "Eng!"

E roko ana tai Hunter n te zip rain ao n namakina te ang rirarikina. Ngke e takakaro ma David ao ake tabeman, e namakina te baiti ao te bebete riki. E a tia n karaoa ae e eti, e ngae ngke e rangi ni kangaanga. E kukurei ngkai e a tia ni karaoa ana rinerine ae eti. ●

Ibukin reiakinan ae bati iaon karaoakin rinerine aika raraoi, wareka My Gospel Standards iakuun Aia Boki ni Kairi Ataei.